

- Harga baru minyak sebenarnya harga asal
- Amaran Mahathir kepada peniaga

JANGAN NAIK HARGA BARANG

Mn.Mt - 2 SEP 1990

KLANG 1 Sept. — Perdana Menteri, Dato' Sri Dr. Mahathir Mohamad, memberi amaran kepada peniaga supaya jangan menaikkan harga barangan ekoran kenaikan harga minyak hari ini kerana harga baru itu sebenarnya harga asal sebelum ia diturunkan pada 1 Ogos lepas.

Perdana Menteri berkata peniaga tidak mempunyai alasan untuk menaikkan harga barangan kerana semasa harga minyak diturunkan pada kadar yang sama dahulu, harga barangan tidak diturunkan sama.

"Ini bukan harga baru tetapi harga lama. Ia dinaikkan semula kepada harga asal sebelum ia diturunkan. Saya harap peniaga jangan cuba beri alasan menaikkan harga barangan," katanya kepada pemberita selepas mengadakan perjumpaan tertutup dengan para pemimpin Barisan Nasional di Dewan Hamzah di sini hari ini.

Dato' Sri Dr. Mahathir berkata demikian sebagai mengulas kenaikan harga barangan petroleum di antara 2.1 sen dan 3 sen seliter berkuatkuasa hari ini.

Mengenai kajian harga barangan pengguna ekoran krisis Teluk, beliau berkata, kajian itu akan dibentangkan pada mesyuarat kabinet minggu depan.

Katanya, setakat ini kerajaan telah mendapat maklumat mengenai peratusan kenaikan harga barangan yang terlibat dengan harga minyak.

Menurutnya, sedikit sebanyak kerajaan kini mendapat gambaran tentang peranan minyak dalam menentukan harga barangan.

Ketika ditanya tentang kemungkinan kerajaan menarik balik larangan mengadakan rapat umum pada pilihanraya

umum akan datang, Perdana Menteri berkata, polis sedang menjalankan kajian mengenai perkara itu dan kerajaan akan membuat keputusan mengenainya setelah menerima maklumat lengkap kelak.

Dato' Sri Dr. Mahathir berkata, walaupun undang-undang melarang mengadakan rapat umum pada masa ini, peraturan itu tidak dipatuhi oleh parti-parti pembangkang.

Beliau berkata, sebelum ini sebuah rapat umum secara besar-besaran telah diadakan di Pulau Pinang oleh DAP, Pas dan Parti Semangat 46 dengan kehadiran yang dianggarkan seramai 20,000 orang.

Bagaimanapun, katanya, polis tidak mengambil tindakan terhadap mereka meskipun perbuatan itu menyalahi undang-undang.

Perdana Menteri juga menyentuh mengenai kerjasama antara Pas dan DAP, meskipun kedua-dua parti itu mempunyai prinsip yang bertentangan.

Katanya, Pas seolah-olah sedar bahawa ia tidak mungkin dapat mendirikan sebuah negara Islam sehingga mereka sanggup membelakangkan prinsipnya dan bekerjasama dengan DAP.

"Dahulu kita terkejut kalau Pas ikut DAP. Sekarang oleh kerana Pas memang terima dasar DAP, tidaklah menjadi perkara luar biasa jika mereka ikut dasar DAP. Jadi kita tidak hairan lagi tentang kerjasama Pas-DAP dan Pas menerima dasar DAP," katanya semasa diminta mengulas keputusan Pas tidak mahu menyertai Majlis Perundingan mengenai Akta Pendidikan.

Sementara itu, ketika berucap di perhimpunan pemimpin bersama rakyat di Padang Sekolah Menengah Tengku Idris Shah, Kapar, Dato' Sri Dr. Mahathir memberi jaminan sekiranya Barisan Nasional dipilih semula untuk memerintah negara, kerajaan menentukan nasib rakyat lebih aman, makmur dan bahagia.

Beliau mengingatkan rakyat jangan tertipu dengan satu pakatan pembangkang yang menggunakan berbagai helah untuk menggulingkan kerajaan sedang-

LIHAT MUKA 6

MO MI - 2 SEP 1990
JANGAN NAIKKAN HARGA BARANG

kan kumpulan itu sebenarnya mementingkan diri mereka sendiri.

Tengku Razaleigh Hamzah yang memimpin kumpulan itu sebenarnya mempunyai sebuah parti kecil serpihan dari UM-

NO dengan keahlian antara 10 hingga 20 ribu orang sahaja, tetapi bercita-cita besar.

"Kalau dia bertanding melawan UMNO, dia tidak akan menang di mana-mana. Oleh sebab

itu dia menggunakan Pas dan DAP sebagai kuda untuk mencapai cita-citanya.

"Tengku Razaleigh keluar dari UMNO dan menubuhkan Semangat 46 kerana dia kalah dan tidak dapat menjadi Perdana Menteri. Dia seorang, tidak mempunyai apa-apa. Dia dikenali ramai, dilantik sebagai wakil rakyat, menjadi menteri adalah kerana UMNO," kata Perdana Menteri.

Malangnya apabila beliau tidak mendapat apa yang dicita-citakan, beliau hancurkan UMNO dengan mengheret parti

itu ke mahkamah sehingga akhirnya UMNO diharamkan.

Beliau sekali lagi mempersoalkan kejujuran Pas yang bercita-cita memperjuangkan penubuhan sebuah negara Islam tetapi pada masa yang sama sanggup bekerjasama dengan DAP, parti yang menolak sama sekali perjuangan Pas itu.

Pemimpin - pemimpin Barisan Nasional termasuk Dato' Sri Dr. Ling Liong Sik, Dato' Sri Samy Vellu, Dato' Sri Dr. Lim Kheng Yaik turut berucap di perhimpunan itu.